

菩薩摩訶薩欲徧知佛十八不共法

當習行般若波羅蜜

智 銘

十八不共法，計：一者、諸佛身無失。二者、口無失。三者、念無失。四者、無異想。五者、無不定心。六者、無不知已捨。七者、欲無減。八者、精進無減。九者、念無減。十者、慧無減。十一者、解脫無減。十二者、解脫知見無減。十三者、一切身業隨智慧行。十四者、一切口業隨智慧行。十五者、一切意業隨智慧行。十六者、智慧知過去世無礙。十七者、智慧知未來世無礙。十八者、智慧知現在世無礙。

佛無身失，亦無口失，佛於無量阿僧祇劫來，持戒清淨故，身、口業無失。佛無量阿僧祇劫，集諸清淨戒成就故，常行甚深禪定故，得一切微妙智慧故，善修大悲心故，無有失。佛拔諸罪根因緣故，無有失。

罪根本因緣有四種：一者、貪欲因緣。二者、瞋恚因緣。三者、怖畏因緣。四者、愚癡因緣。佛於是罪根因緣及習皆已拔。佛於一切法中，徧滿智慧常成就故，若不知，故有失。佛諸煩惱習盡故，無如是失。佛一切身口業，隨智慧行故，身無失，口無失。

念無失者：四念處心長夜善修故，善修甚深禪定，心不散亂故。善斷欲愛及法愛，諸法中心不着，得第一心安隱處故，若心遽忽忽，念有忘失。佛心無得失，以是故無失。佛宿命通、明、力，三種莊嚴念故，心無失。佛一切意業隨智慧行故，念無失。一一念隨意行故，如是等名為念無失。

無異想者：佛於一切象生無分別，無遠近思想。是貴可為說

，是賤不可為說。如日出普照萬物，佛大悲光明，一切憐愍等度；恭敬者、不恭敬者，怨、親、貴、賤，一切悉等，佛以佛眼一日一夜各三時，觀一切象生誰可度者，無令失時。等觀象生故，無有異想。佛種種因緣讚善法，種種因緣訶不善法，亦於善於惡心無增減，但為度象生故有是分別，是為無有異想。「一切不行經」中說：佛觀一切象生如己身，所作已辦，無始、無中、無終，是名無異想。佛觀一切象生及諸法，從本以來至不生不滅，常清淨如涅槃，是名無異想。不二入法門是諸法實相門，異相法即是二法，二法即是邪道。佛是無誑法人，不應行誑法，常行不二入法門。誑法即是異相，如是等名無異想。

無不定心者：「定」名為一心不亂，亂心中不能得見實事，佛無不定心。無不定心者，有種種義：定名常攝心善法中住，佛於諸法實相中定，不退不失，是名無不定心。欲界中有定，入是定中可說法。以是故，阿毗曇中說欲界繫四聖種、四念處、四正勤、四如意足、五根、五力、無諍三昧、願智、四無礙智，有如是等妙功德，佛入欲界中定故，應無不定心。佛從定起，入欲界定，初無散亂心時，以是故名無不定心。佛在定亦能說法，亦能遊行，如蜜迹經中說：諸佛心常在定中，心亦應說法。復次：散亂心法，諸結使，疑、悔、等，佛皆無。佛於一切法中常定無疑，無不定智慧故，佛於一切智處中，智滿故無亂。唯佛一人名不誑法，三堅固人中最上，苦樂心不異。一相異相，生滅相，斷常相，來去相，如是等諸法相，皆是誑法，虛妄和合作法故。佛安

立於諸法實相中故，心無不定，無不定故心不異。五種不可思議法中，佛最不可思議。是十八不共法，是佛甚深藏，誰能思議者，以是故，佛無不定心，事必當爾，佛雖常入定，無覺觀初心，有不可思議智慧故，亦能說法。譬如天樂，隨天所好，種種聲應，是亦無心，亦無識法，以諸天福德因緣故有是。如天樂無心無識而能應物，何況佛有心而不說法，以是故，說佛無不定心。

無不知已捨者：衆生有三種受：苦受、樂受、不苦不樂受。苦受生瞋，樂受生愛，不苦不樂受生愚癡。是三種受：苦受生苦，住苦滅樂。樂受生樂，住樂滅苦。不苦不樂受，不知爲苦，不知爲樂。餘人鈍根故，多覺苦受、樂受，於不苦不樂受中，不覺不知而有捨心，是爲癡使所使。佛於不苦不樂受中知覺生時、覺住時、覺滅時，以是故，言佛無不知捨心。於此中不苦不樂受即是捨。二處捨亦是捨，何以故？餘人於不苦不樂受中，不覺念中生時、住時、滅時，久遠乃覺，佛念念中盡皆了知。七覺中捨，若心正等不沒不掉，是時應捨，若沒時行精進想，若掉時行攝心想，佛於念念心中，粗細深淺無不悉知，知已而捨，所謂知已而捨，是於大眾中疲厭故小息。復次，佛世世常愛遠離行，長夜樂行遠離。以是故，佛入禪定，佛常捨心成就，故入禪定。佛遠離憤鬧及雜語處，亦自觀諸佛功德藏，亦受第一清淨樂，故入禪定。佛說法已，常教諸比丘當坐禪，無令後悔，口之所說，身亦自行，故入禪定。厭惡供養故，知衆生應得度者，入禪定作化人往度。有衆生定少慧多者，身示行禪以教化之。有人常見佛生厭想故，小遠離令其饑虛故。佛欲爲諸天說法，故在閑靜處。佛爲後世作法故坐禪。又佛自轉法輪已，以事付弟子故，入禪定。現二種道攝衆生故：一者、禪定。二者、智慧。佛在大衆說法，爲現智慧。靜處攝心，爲現禪定。衆生於六塵中三種行：見好色生喜樂，見惡色生憂苦，見不苦不樂色生捨心，乃至法亦如是。佛於六塵中自在：於喜樂、憂苦處能生捨心，如聖如意中說。如是等種種因緣故入禪定，非不知已捨。

欲無減者：佛知善法恩故，常欲集諸善法故，欲無減，修習諸善法，心無厭足故，欲無減。佛以欲心無厭足故得佛，雖更無

功德可得，欲心亦不休。佛雖一切善法功德滿足，衆生未盡故，欲度不息。摩訶衍首楞嚴經中說：佛於莊嚴世界，壽七百阿僧祇劫，度脫衆生。以是故，說佛欲無減。

精進無減者，如欲中說欲義，即是精進。欲爲初行，欲增長名精進。如佛說：一切法欲爲根本。欲如人渴欲得飲，精進如因緣方便求飲。欲爲心欲得，精進爲成其事。欲屬業，精進屬三業；欲爲內，精進爲外，如是等有差別，復次，是精進諸佛所樂，如釋迦牟尼佛精進力故，超越九劫，疾得阿耨多羅三藐三菩提。佛爲度衆生故，捨甚深禪定樂，種種身、種種語言、種種方便力度脫衆生。或時過惡險道；或時食惡食；或時受寒熱；或時值諸邪難問，惡口罵詈，忍受不厭。佛世尊雖於諸法中自在，而行是事，不生懈怠。如佛度衆生已，於薩羅林中雙樹下臥，猶度末後弟子外道梵志須跋陀。佛世世樂行精進，今猶不息，是故言精進無減。

念無減者：於三世諸佛法，一切智慧相應故，念滿足無減。失念名誤錯，減名不及。失念名威儀俯仰、去來法中失念；無減，名住禪定神通，念過去、現世通達無礙。故念無失與念無減，有是差別。佛於念念中皆分別三相，佛心無有一法過而不念者，以是故，獨佛有念無減。復次宿命智力隨念知，佛於是有有力。復次，佛以一切智無礙解脫守護念，是故無減，如是等因緣故，佛念無減。

慧無減者：佛得一切智慧故，慧無減。三世智慧無礙故，慧無減。復次，十力、四無所畏，四無礙智成就故，慧無減。從初發心無量阿僧祇劫，集一切智慧故，深心爲法故，頭目腦髓，悉捨內外所有而布施；入火投山、剝皮釘身，如是等無苦不受故，一心爲集智慧故，慧無減。佛智慧以一切功德：持戒、禪定等助成故，慧無減。世世求一切經書，世俗法，佛法，粗細，善不善，悉皆學知故，慧無減。從十方無量諸佛所，聞法讀誦，思惟修習，問難故，慧無減。爲一切衆生故，爲增益一切善法故，破一切處無明故，慧無減。是智慧實知諸法相不生不滅，不淨不垢，無作無行；不分別是智非智，知諸法一等，清淨如虛空，無染無

著；不以二法故得不二入法相，不二入法相無量無邊，以是故慧無減。如是等種種因緣，慧無減。

解脫無減者：解脫有二種：有爲解脫，無爲解脫。有爲解脫，名無漏智慧相應解脫。無爲解脫，名一切煩惱習都盡無餘。佛於二解脫無減。何以故？佛智慧第一利故，煩惱習永盡無餘故，解脫無減。復次，如漏盡力中說：佛與聲聞解脫有差別。佛得漏盡力故，解脫無減；二乘無力故有減。

解脫知見無減者：佛於諸解脫中，智慧無量無邊清淨故，名解脫知見無減。佛一切法中，但於六事中無減者，佛於一切自利利他中，四事能具足：欲，求一切善法之根本；精進，能行；念，能守護；慧，照一切法門，斷一切煩惱。用是四法，事得成辦。是四法果報有二種：一者、解脫。二者、解脫知見。解脫知見者，用是解脫知見，知是二種解脫相：有爲、無爲解脫。知諸解脫相，所謂時解脫，不時解脫；慧解脫，俱解脫；壞解脫，不壞解脫；八解脫，不可思議解脫，無礙解脫等。分別諸解脫相，牢固不牢固，是名解脫知見無減。佛上上智慧根成就，知諸法念分別相生滅故，解脫知見無減。復次，法眼清淨，具足成就故，如法眼義中說。知是衆生空解脫門入涅槃，是衆生無相解脫門入涅槃，是衆生無作解脫門入涅槃；知衆生觀五象門、十二入十八界，如是種種法門得解脫。佛於是解脫知見，盡知徧知，是故說佛解脫知見無減。

一切身業、一切口業、一切意業隨智慧行者：一切身、口、意業，先知然後隨知行。諸佛身、口、意業，一切行無不利益衆生，故名先知然後隨智慧行。如經中說：諸佛乃至出息入息，利益衆生，何況身、口、意業，故作而不利？諸怨惡衆生，聞佛出入息氣香，皆得信心清淨，愛樂於佛；諸天聞佛氣息香，亦皆捨五欲發心修善。以是故，身、口、意業隨智慧行。佛先以智慧起身、口、意業，故無失。復次，佛成就三種善業，三種寂淨業，三不護業。以是故言：我一切身、口、意業，先以智慧，然後隨智慧行。

佛以智慧知過去、未來、現在世通達無碍者：此三種智慧，

于三世通達無碍故，三業隨智慧行。所謂知過去、未來、現在者，觀在心，雖一念時不住，相續生故，能知諸法。內以現在意爲因，外以諸法爲緣，是因緣中生意識，用意識自在知過去、未來、現在法；但不自知現在心心數法，餘者悉知。般若波羅蜜如相品中所說三世一相，所謂無相。此言佛智慧知三世通達無碍者，蓋諸佛有二種說法：先分別諸法，後說畢竟空。若說三世諸法，通達無碍，是分別說，若說三世一相無相，是說畢竟空。復次，非一切智人，於三世中智慧有碍，乃至觀世音、文殊師利、彌勒、舍利弗等諸賢聖，於三世中智慧皆有碍。以是因緣故，說佛智慧於三世中通達無碍，不爲空事故說。復次，有人於三世中生邪見，謂過去法及衆生有初、無初。若有初，則有我衆生；諸法亦無因無緣而生。若無初亦無後，若無初、無後，中亦無。初名有中、有後，無前；後名有初、有中，無後；中名有初、有後。若衆生及諸法無初、亦無中、無後，若無三世，則都無所有。復次，若無初，云何有一切智人？破如是等邪見故，說三世諸法一相，所謂無相，不爲破三世佛智慧。佛有二種道：一者、福德道，有人聞佛十力、四無所畏、四無礙智、十八不共法等，生恭敬信樂心；二者、智慧道，有人聞諸法因緣和合生故，無有自性，便捨離諸法，於空中心不著。福德道，能生諸功德；智慧道，能於功德道中離諸邪見著。以是故，佛雖說諸法畢竟空，亦說三世通達無碍。

十八不共法中，但說智慧功德等，不說自然果報法。復次，是十八不共法，阿毗曇分別五象攝，身、口無失，身、口隨智慧行，是色象攝；無異想，是想象攝；無不定心，是識象攝；餘者行象攝。皆在四禪中，佛四禪得道得涅槃故。有人言：四色不共法，色界、欲界中攝；餘九地中攝。皆是善，皆是無漏法。四色法二因緣生：因緣、增上緣；餘殘四緣生。四無緣，十四有緣。四隨心行，不與心相應；十三與心相應，亦隨心行；一不與心相應，亦不隨心行。如是等種種，阿毗曇分別說。初如是分別，入般若波羅蜜諸法實相中，盡皆一相，所謂無相。入佛心皆一切滅相，是菩薩摩訶薩欲徧知，當習行般若波羅蜜。